

摘藻堂四庫全書薈要

集部

欽定四庫全書薈要

集部

青山集卷五

六

詳校官助教臣常循



欽定四庫全書薈要卷一萬五千九十六

集部

青山集卷五

宋 郭祥正 撰

五言古詩

陳安止遷居三首

陳子勇於退退無十椽屋隣家頗好事借宅並

蒲浪切

山

隲堂廡稍寬靜垣墻亦新築春渠漲朝雨涓涓漱寒玉  
呼兒種瓜果教僕洗松竹身雖在城郭志實寓磎谷誦



持方廣經一食止蔬粟所喜遠羶腥佛事要清肅弗學  
陶長官持盃媚秋菊弗學屈大夫含悲葬魚腹唯慕金  
粟老不二常具足若許浪士游時時跨黃犢

陳子貧無居東家借茅屋達士寧羞貧四方所居隩平  
臺荔陰下天匠資爾築青分一畦蘭綠種萬竿玉幸遭  
文明運志宣效孤竹又非遠人音欲以逃空谷脩然置  
藤榻示疾肖金粟呪飯施諸鬼夜來風肅肅嗟予在羅  
網未暇親杞菊憂愁無端來刀劍攪胃腹渺思泛滄浪

期君濯雙足時或臨大野泥耕看健犢

彼美隱吏隱蒼林映深屋俗駕遠庭除佛像鎮堂隩蘭  
芷稍扶疎荆榛已鋤築沉思第一義修持若磐玉覺城  
開迷雲魔軍當破竹接人有餘地拔我出坑谷齋羞復  
招要甘香蒸黍粟永與羶葷辭既飽精神肅石坐觀枯  
蒲茶甌泛新菊醅醕灌諸頂飢火滅空腹昔聞居士飯  
一鉢萬人足君若乘三車願為車下犢

喜雨

陰雲海上來飄風亦隨至  
填空翻猛雨溢溜迸平地  
豈惟滋稼穡高視掃瘴癘  
羣山各藏晦萬壑恣吞噬  
蚊蠅暫驅除草木起憔悴  
榕枝碧疑染荔子紅欲墜  
呼兒索杯盤四體襲涼氣  
豐年固有兆此雨信嘉瑞  
一人堯舜聖三公夔高備  
陰陽茲調和樂飲真吾事

月下懷留二君儀

默坐兩股痺幽行整頭簪  
無家不成寐有酒何處斟  
山色九秋靜月華中夜深  
遙想端居人焚香哦妙音

寄題留二君儀田園碁石亭

盤石發天巧新亭君所營  
席展瑤琪滑坐久寒陰生  
遠瀑曳修幔他山列蒼屏  
水田白鷺下霜樹青猿鳴  
回首同安縣殘陽樓觀橫  
不逢車馬來時愛牛羊  
經童僕種刈畢父老樽壘傾  
昇平信難偶歡笑聊舒情況  
攻李杜吟字字無淫聲  
春來成幾章想有碁石銘

人世無百歲塵勞枉營營  
豈如田園樂歌嘯送餘生  
况聞盤石上開亭石為屏  
卷簾春雨足洗耳松風鳴  
孤鳥

望中沒淡煙山際橫時復命兒息講道或傳經經罷哦  
五言珠璣滄海傾嗟我無羽翼往適幽憂情

同蕭英伯登陳安止嘯臺

食訖雨初霽相將陟高臺縹緲臨諸峯幔卷濃雲開秀  
特不可掩擎天碧崔嵬漳流欲赴海澎湃西南來陰陰  
荔子木合抱何年栽幽鳥轉枝語清風與春回佛宮四  
面出紺碧疑蓬萊寓隱得斯地足以攄君懷方庭有蘭  
芷近郭無虎豺萬事不挂慮長年效僧齋一為孫登嘯



而與數子諧顧我病且老况復時運乖兒歸半道死旅  
棺未葬埋破甑已弃物乃非君子儕從游得無玷泯默  
甘擯排

送廣東漕孫知損失官歸汶上

平生愛東州土厚人不罄見公惜已晚達論聳予聽五  
馳使者車中道罹陷阱開懷無怨尤得失兩以正歸程  
萬餘里脩然一煙艇鄉關今非遙踴躍理三徑進則仗  
忠義退則樂溫清高卧固無必求才堯舜聖亭亭南澗

松愈老節愈勁柔柔水中蒲涵春自嚴靜百年未闔棺  
安之吾有命

讀陶淵明傳二首

我愛陶淵明超然遺世想一奏無弦琴妙曲寄玄響脩  
然聽以氣萬籟應諸掌舟車就所便丘壑信孤往泉涓  
木欣欣酌酒助俯仰酣醉頽雲煙舒嘯逸羅網斯人孰  
可見夢寐期髣髴兀如南山松亭亭植千丈

陶潛真達道何止避俗翁蕭然守環堵褐穿瓢屢空梁

肉不妄受菊杞欣所從一琴既無弦妙音默相通造飲  
醉則返賦詩樂何窮密網懸衆鳥孤雲送冥鴻寂寥千  
載事撫卷思冲融使遇宣尼聖故應顏子同

普利寺自周上人高明軒

世人孰無累貴彼方外人超然雲霞趣迥脫生死輪周  
也漳南釋開軒瞰漳濱山光并水影二物長清新尤愛  
明月夕蒼林變金銀焚香坐軒上時或要靜賓幸無歌  
吟喧得與麋鹿馴嘗茶煮山藥長養菩提因豈慕富且

貴寧憂賤與貧我來勿厭數從爾陶天真

同留二君儀登高明軒

羈客厭卑濕登軒喜高明紅日簷下度白雲牕半生并  
吞山川秀映帶樓殿平舟航濟吳楚笑語落蓬瀛春風  
時一來百鳥相和鳴隔牆酒可沽千金為君傾既絕世  
上趣雅遂林中情勿云暮靄合更待孤蟾升

同陳安止登高明軒

有客學清淨喜為林下游茲軒高且明駐策同其休目

界既朗徹心官欣自由棄祿慕居士讀經親比丘雲樹樵  
聲遠石磴春水流鳥羽瑩可數花光暖爭浮已知隔人寰  
日落山更幽適此悟無生餘事安足求

題淨惠院

方塘水未漲荷芰新展綠游子愜輕衣步與孤雲逐初  
臨寺外橋已聽鐘聲肅徐登山後亭蔥蒼翳松竹諸峯  
却羅列龍蛇互奔觸紅綃卷晴霞白雲落孤鷺了然身  
世忘豈念冠帶束平時謬持節善地甘厚祿更窮泉石

樂曾未伸啓沃何以報君恩堯天漫凝目

題淨衆院贈蒙禪伯

南州三百寺此寺最輝煥石開千丈渠泉飛日華亂供  
僧無定員連牀接雲漢經營始十載物物悉已換上人  
固多才不獨悟禪觀其師老黃蘗簡肅衆所憚承音既  
親切妙頂醍醐灌登門已清涼定步濟彼岸融融接軟  
語羣疑自消泮每游即忘還微風洒塵汗

題月淵亭

仰攀明月輪俯瞰滄海淵乾坤惜形勝此地何其偏靈  
溪九龍躍仙山一峯圓微紅散晴綺遠碧襯瑤煙幽香  
發野秀接語皆老禪緣何近城郭了無人世喧邂逅攝  
邦守所樂多林泉唯憂代者至不得經殘年老矣寧復  
來吟哦強留連他時考陳迹不減斯亭篇

送范端仲推官

范君建陽客讀書過萬卷下筆又神速數預賢能薦省  
闈復擅場聲名動海縣一投紅蓮幕阻上金鑾殿志氣

老不衰苦柏冒霜霰當塗少知己薄祿勢所戀君子困  
下僚佞士即華選顧我駕散才攝守頗優便公庭可羅  
雀雲山復對面坐卧臨清風吟哦揮羽扇相逢始相樂  
瞥去若驚電君行我幽獨送君聊自嘖

池上晚景分得上字

秋風何處來蕭然洗炎瘴時要二三子臨池倒嘉釀逢  
辰既昇平覽景又清曠寂無人世喧頗覺神魄王雪鷺  
集滄洲金烏沒青嶂悠悠漁笛還漫漫潮痕漲黃蜂立



蓮葉頰鯉吹萍浪始信莊生言觀魚樂濠上

漳南書事

元豐五年秋七月十九日猛風終夜發拔木壞廬室須  
吏海濤翻倒注九溪溢湍流崩重城萬戶競倉卒馬牛  
豈復辨涯渚恍已失嬰老相携扶迴首但悽慄憂心漫  
如焚救疹竟無術憶昨攝印初歲望頗云吉田疇時雨  
足秔糯各秀實胡為兆陰怪平地遭滴汨尤嗟梁棟材  
中道摧折畢日月有常度金行正蕭瑟疇咨風雨師殘

害皆天物天心本好仁忍眎久不恤況今太上聖治具嚴  
且密騎馬藏民間教兵授神筆四夷還舊疆百辟奉新  
律固宜集和氣祥瑞為時出緣何漳南民憔悴抱愁疾  
終當呼長鯨一吸見蓬蓽

臨漳亭觀水分得大字

憂民登危亭注眎萬里外溟濛雲氣浮勢與江海匯蒼  
山恐低沉沉復問畎澮禾麻安更論老稚念顛殍蛟鼉  
自出沒牛馬失向背雨師恣侵陵人理亦可罪殷殷非

雷聲遠近屋廬壞君臣正逢時上下宜交泰驅雲請白日朗徹照幽怪一雨即瀰漫孰謂乾坤大

送孫公素朝奉還臺

暑雨正鬱陶流汗坐深甌忽聞公素來清風先滿徑高談別後事琳琅發吾聽聽之復何如五月冰雪瑩况逢至治朝日月開二聖大臣用老成羣辟要方正如公亦幾人尚未擢諫諍浮舟每經年山川寓幽興皇皇歲華晚曳屣漫吟咏行矣勿徘徊金門待新命

題妙勝院西軒并贈權師

老木不知年蒼藤已垂地高枝生晚陰低枝散涼氣好  
鳥時復來鳴聲似絃吹道人開小軒幽庭增廣庇龐眉  
霜雪頂休焉釋塵累餘功又及物丹砂和去聲靈劑一粒  
愈沉疴求者四方至應接運慈悲平等均我施相逢惜  
已晚殘光念如寄何當擇深山同師樂禪味

清江臺致酒贈范希遠龍圖

攜手出煙霧致酒清江臺水淺橫沙露林踈遠山來白

鳥一雙落青猿三叫哀誰展摩詰圖而把淵明梧妙娥  
始七歲彈箏殷晴雷或如鸞鳳吟喚得陽春回主人亞  
父孫卓落王佐才高談使我聽明珠欲傾懷爽魄超太  
虛月窟無飛埃一飲不知醉浩歌忘草萊遲明擊雙槿  
回首安在哉尺水公自養以待天門開

贈陳思道判官

自從梅老死詩格失平淡我欲回衆航力弱不可纜栖遲  
二十年時時漫孤噉忽逢陳夫子兩目海水湛為我聊一

吟粹芳超俗艷又如趙氏璧毫髮絕瑕玷愈多愈精好  
璀璨摘驪頷借令李杜在決敵應未敢低頭亟趨降吞聲  
就誅貶招來君尚謙且曰吾與點窮朝把樽酒金竿銀  
浪颭胡為眷幕府半百尚坎壈幽蘭沒蕭艾明珠混野  
芡何當叩相閣斯人願收歛置之翰林中萬丈看光焰

鳳凰驛

晚泊鳳凰驛得名知謂何鳳凰不可見篁竹空婆婆四旁  
俱石崖一逕縈雲蘿慘慘陰欲雨淙淙澗跳波驛吏指英

州兩舍皆平坡久寒無瘴癘虛市饒鷄鶩我行既已遠  
樂少憂常多過江紅葉舞度嶺黃鸝歌時序逼衰老羽  
翰驚網羅一夕得佳處休馬聊獨哦

### 輪石

輪石如車輪削立萬丈壁湍流走其根倒影翠霧滴天  
公不推去此意人莫識雖無載輓功免有圓轉迹隔江  
欲登臨賃舟終不得既乏官長威人事輕遠客胡為秀絕  
姿往往在幽僻童僕驚日晚策馬若相逼哀哉携妻子

未暇往棲息沉吟復回首捨旃欲何適

題清遠峽廣慶寺壁

平明下墟落晚投清遠峽銀潢注地來翠壁連天插中  
含五峰秀寺載三車法龍歸石有痕犀躍無遺押直鉤  
誰得魚危磯待鷗狎長廊曉前題習之最為甲物理求  
其全用材無乃狹渾詩亦可取小雨繞一霎未能臻甫白  
源長流不乏持盃聊酌茗清風為停筵超然望日下嵐翠  
忽頽壓忍涕上孤舟低頭隨雁鴨



次韻頴叔修撰游朱明及字

朱明洞天門元戎要客入誰云蓬萊遠浮丘果相挹如  
超頻地禪曾不假梯級幽篁隔蔥蒨沆瀣朗呼吸玉山  
有嘉禾鳳凰乃來集桃李爾何知漼漼紅露泣應嗟塵  
世人牕間白駒急行樂如之何不樂嗟何及

五仙謠

番禺五仙人騎羊各一色手持六秬穗翱翔遶城壁翩  
然去乘雲諸羊化為石至今留空祠異像猶可識曾聞

經猛火毫髮無痕跡五仙寧復來三說頗難測只憂風  
雨并半夜隨霹靂君不見羌廬劉越之洞天萬象森羅  
無一尺

誌游呈蔣帥穎叔

焚香瞻五仙登樓瞰滄海題軒名雙林却酒飯蔬菜

五仙

觀山海樓興  
化寺二軒

還趨法性寺爛熳登幽晦房公潤經處蘭

陞遺芳在

房融潤色  
揚嚴之地

老木已千年成林播佳話

藥止所  
種云此

樹下當有菩提  
受戒度人成林

危壇半頽缺曾傳祖師成

即六祖也今  
為乾明禪師

達多與制止古像各滿洒歸時已殘陽心淵生沆瀣蘭  
亭世俗飲尚足傳異代佛境清淨緣浩劫永不壞聊  
誌一日游結交向方外

是日與穎叔  
二人者同游

### 再和穎叔誌游

君為五羊仙我効退之拜默契如來禪安用傳畫繪滄  
海雖云濶萬里有限際

音債

請從造物論一瞬即破碎靈

龜胡為靈鑽灼爛腹背生能發幽寃神理助奇怪

見五羊天

慶觀龜事

晚投古寺食葷味不如菜摩挲庭下碑百歲蒼蘚

晦忽逢潤經處房公儼如在度人要成林今已播禪話  
忽為殺盜淫佛勅所告戒種子積無明應須法雨灑幸  
陪蓮社緣彼此吸清瀝噫嗟繫軒冕憔悴塵垢態一朝  
趨地獄苦惱孰肯代瑩如摩尼珠誰使濁水壞與公誌  
斯游浩蕩形骸外

獨游藥洲懷穎叔修撰

驅車欲何適獨往觀藥洲荒蘆喧鳥雀怪石森龍虬大  
亭插層城玉虹跨深溝雙門控西渚

石門也

九星聚中流

九曜石也其名何壯哉像貌儼可求  
張王卷國去故物惟此

留滄溟霸氣滅落日孤煙浮空畦已無藥草蔓春桑桑  
常年一百五載酒傾城游炎炎二聖作德澤覃海陬大  
帥用文儒靜鎮十五州請公握鴻筆刻鮮揮戈矛仍要  
水宮月一笑挹浮丘蓬萊自茲往穩踏金黿頭

九曜石奉呈同游蔣帥穎叔吳漕翼道

番禺西城偏九石名九曜危根插滄浪古魄鎮臨眺何  
人試巧手鑿此混沌竅森森毛髮散偉偉儀形肖葱蒼

翠霧濕玲瓏秋月照痕添海潮上聲酸朔風叫龍歸憂  
利劍鼇泣怖長釣曾非借霹靂安得離巖嶠菱溪與太  
湖所得信未妙誰將置濠隍我願植廊廟堅貞以類舉  
邪僻令遁跳濡毫勒陰崕卑語君莫誚

和穎叔游浮丘觀

潭潭洞天門孰出朱明右窅疑雲翼張竦見冰骨瘦飛  
仙時往來別有通海竇此亭僅傳聞世人豈能覲歌簷  
榛棘合壞壁青紅舊汲泉煉丹處頽毀無完甃不逢博

物人妙迹誰復究黃冠稟使旨乘時力營構飛閣凌滄  
波誅林逐羣狄松蘿翠欲滴蘭茝芬可嗅秋蟾助餘魄  
蓬島分小岫披披宿藹散泠泠諸籟奏超然俗慮息揮  
手出宇宙況逢老集仙氣奪天下秀落筆成千言霹靂  
震白晝於茲惜分携作意須揅袖

穎叔招飲吳圃

五跛開畫戟平明出重闥小橋分野徑吳圃會衆賓  
番禺二月尾落花已無春唯有薔薇水衣襟四時薰短垣

乃浮丘樓觀何斬新我公發幽晦輸金走車輪蓬萊飛  
一島雲外拖晴紳此景在眉睫圖繪未必勻從來不彈  
弋傍砌鳥雀馴寄語北海若停風護松筠負才詩傲敵  
縱酒吞湖漚酩酊安足辭不飲終成塵逍遙一日事浮  
脆百年身何須跨黃鶴追彼瑤池人但當聽公歌賣交  
斥張陳達道齊生死筆端真有神揮灑十八韻一一無  
價珍老彼杜工部玄哉楊子雲

鵠奔亭呈帥漕二公



新江自南來西與端江匯寒光入靈羊一碧浸羅帶屹  
然鵲奔亭遺音溢千載羽儀其可見窈窕想殊態遭戕  
瘞同坎襦布久不壞訴冤如生平隱顯一何怪讐人閨  
戶戮化質搏風快且將憂患辭浩蕩煙霄外鳥飛并劍  
躍類與神靈會物變固難窮撫事增感慨周侯昔行部  
美績此尤最江生引為言建平平捐罪宥興跨唐虞乾  
坤正交泰皇華命俊哲枉橫無纖芥琳瑯斯亭篇證古  
欲陳成殺人貴滅口覆族竟自敗姦諛誅既死潛德發幽

晦堅珉可磨鑄榮光底長在

端州逢故人劉暉光道致酒鵲奔亭作

貴池昔分袂端江復傾盖屈指十六秋華髮驚老大雲

霄邈功名荆榛森患害衆人皆欲殺出門即有礙

上杜句下

孟句咄哉不復道致酒强高會蒼梧帝魂寂鵲化遺亭在

翠葆櫻玉簪金鱗躍羅帶

韓云江似青羅帶山如碧玉簪

風澄嵐靄散

擢擊天影碎往古悉已空來今竟何待勞形百年間投足萬里内秋水正瀾漫醉眼逐澎湃一絲携六鼇猛擲

滄溟外

將歸三首

春田豈不美春園亦可佳  
田水流泱泱園禽語啾啾  
荷笠復携鋤動作頗自諧  
隣叟三五輩擊壤歡無涯  
祿仕四十年志運良已乖  
許國既無補陷穽幾沉埋  
皇恩湛昭洗印綬蒙優差  
內循齒髮衰愧彼英俊偕  
休焉保其終飛章乞殘骸  
將歸樂復樂清風掃孤懷

結廬謝山下門荒蘿徑深  
寂無車馬跡而有猿鳥音  
高峯

落日盡遠壑歸雲沉沉生一吾趣長嘯亡頭簪勇往復  
此樂俯仰安可任

垂老度庾嶺西江守端州逾年黍稷食歸思忽驚秋結  
廬丹湖邊種木菓屢收挂冠已不早懸花隨兩眸休休  
保殘齡擊壤歌皇猷有兒集吏選餘事復何求回首天  
地思瞑目終難酬

贈上藍晉禪師

泐潭月公晦其禪妙諸方傳之晉伯明獨步入豫章一

登上藍座日月迴輝光問法瞻大室方廣不可量人人  
得甘露灌頂心清涼又通世俗書落筆皆文章衆鳥難  
悉名卓然唯鳳凰羽儀下雲霄五色在山岡先帝昔臨  
御京城開寶坊明詔求法才衆老爭低昂惟師不妄念  
安之如太行乃知北遠師駕幸不下牀所傳信非訛千  
載兩相望篁竹架清風喬松裒寒霜回心剃鬚髮永願  
陪翱翔

望廬山懷陶淵明

匡廬初在望復憶柴桑翁醉來卧盤石悶默天地通不  
入惠遠社自彈無絃桐悠悠出谷雲漠漠栖林風倚巖  
片月白落磴寒泉洪此意非眺聽遙知與君同

追和韋應物廬山西澗瀑布下作

徘徊西澗下聽泉濯煩襟煩襟遂蕭爽妙音非世音不  
知岐路絕貪玩煙蘿深斧斤未嘗入高材自成林鶴鳴  
豈有怨雲去本無心寥寥陸簡寂古意難追尋

宿栖賢寺

遙憐李太白吟望瀑布水不知三峽流翠洒虛烟裏雄  
聲雷雨驟遠響松風靡誰留千丈虹長在雲根倚遂令  
車馬來朗瞻樓殿啓明明銀色界浩浩蟾波洗居中梵  
天衆聞思悟玄理長老乃摩詰取供在彈指普薰毛孔  
香真實超凡鄙病夫寄一榻清冷耀心耳飄然睡魔去  
策杖中夜起不能跨鯨魚揮筆信非美

宿歸宗寺

曠懷王逸少宅地如翔鸞池水至今黑云是墨未乾施

作金仙宮樓殿排羽翰銀榜留飛鳥玉蜃吐驚湍耶舍  
寶塢近筆插青雲端貝葉五千書兩藏龍鱗蟠鐘磬遍  
虛籟松杉扶歲寒護持不變滅鑪煙晝漫漫暫游寄僧  
榻脩然心界寬愧無警絕草付與蒼崖刊

新昌吟寄穎叔待制

元祐丙寅冬新昌有狂寇名探其姓岑厥初善巫咒南  
民欣尚鬼來者爭輻輳經年惑羣衆詭術遂潛構摧城  
止三閩作蜂唯撒豆竹竿變鎗旗銳兵莫吾闕此事古



未聞造意無乃陋蚩蚩彼何知丁壯擁前後長驅向城

郭塵土翳白晝刺史亟閉戶神理默垂祐城頭無百兵

坐待五羊救賊中衆所見戢戢羅甲冑須臾薄音博寒陰

凍立多僵仆平明若鳥散賊本未遑究權帥計倉卒遣

將速誅蹂貪功恣殺戮原野民血溜嬰兒與婦女屠割

僅遺脰傳報及南昌新帥若煙走穎叔至洪聞報即星馳度嶺有詩云六日

聞賊報七日走如煙入境亟止殺渠惡用機購逾旬果獲探腰斬餘

悉宥朝廷方好仁帥畧寔能副臺章請褒賞詔語優以

懋撫綏聊借才侍從爾來復身居江湖上名近日月右

已上畧制

麟兒隨飛龍

戊辰季嗣遂登科

陰隲資貴富彼美南

詞中語

山松盤盤千丈秀終為廊廟器未許連城售吳毛持漕

節文彩爛錦繡發為新昌行洪鐘待誰扣我將磨蒼珉

為公悉鏡鏤

運判吳翼道毛正仲皆作此詩見帥賦之並刻石立於新昌之使廳

### 送許栖默道士

結廬守親塚淡食畢喪制焚香誦寶經傾悲拔冥滯神明扶孝思肌髮保陽氣支離僅不死鄰里為歔歔倏然

叩予門殷勤謝銘誌袖携一幅圖離坎備形勢明堂正  
丘穴松檟列新翠身雖離塚傍披圖即流涕拏舟遽言  
別諱日仲春至酌水採嘉蔬藉草具嚴祭又言廣栽植  
薄取歲時利事死如事生終焉達斯志儒者似君稀况  
復褐冠類誰為孝子傳吾詩信無偽

青山集卷五

欽定四庫全書薈要卷一萬五千九十七集部

青山集卷六

宋 郭祥正 撰

五言古詩

送胡推官赴無錫丞

愛山不離山君來訪山間山間只欠水聽君語潺潺滋  
我山色秀洗我塵心煩如何遽言別驚驂欲翩翩試才  
得佳邑割鷄鳴刀鐶雙親尚未老伯氏趨朝班藍田玉

一雙浮出濡須灣天作王者瑞寧獨名鄉關自憐困已甚風流邈難攀新詩倘許寄秋雁無空還

送胡與幾被召赴闕

嗟我老已疲掛冠歸舊廬素乏二頃田無可把犁鋤窮年小山下獨伴千卷書作止隨古人襟懷稍欣如又無樽中酒能延故人車感君數相過氣豁眉宇踈天馬出月窟回薄萬里餘其才無不宜祿仕猶拘拘忽聞明庭詔一節馳輕輿往必陟臺省公言壯皇圖潛心救世弊

肯專為身謨法密吏愈偷食衆財益虛本大末漸弱豈

在專

闕

指瑕一二人此事尤可吁細碎何足論綱舉

目不渝譬彼脉已病其身尚膏腴要當速內究珍丸應  
時須良醫望數公潤澤回焦枯願如范文正挺特真丈  
夫老死見太平委棄甘路衢

送馬東玉朝散還朝

秋空若明鏡雲物瑩可數臨高送遠發况復瞰牛渚  
崔嵬水帝宮半出燃犀浦橋基挿波瀾王氣逐龍虎歸艤

豈能留兩槩幾欲舞重光  
瞻舜日羣材入天畧  
聘聘馬東玉松柏耐寒暑  
五載佐吾邦大匠善規矩  
仁民而愛物巨細各有補  
宴閒集賓朋風流照樽俎  
能詩又敏速往往造險語  
交章久薦達名聲動寰宇  
胸中蟠虹蜺行矣須一吐  
伊予百無堪投老尚好古  
垂竿魚未食茹蕖口忘苦  
唯君最相知稱為等鮑庾  
君歸我何適形影守溪滸  
時寄一行書焦枯望霖雨

謝涇川宋宰惠近詩



不到涇上邑倏忽二十載環山敞樓閣金碧想未改長  
溪拖翠玉洗月發光彩秋聲咽松杉夜氣馥蘭茝白鳥  
自成羣黃猿行作隊仙人控鯉去巖下遺跡在猶疑深  
雲中彈琴尚相待唐儒工翰墨石壁露瓌瑋意有神明  
憐塵蘚不得浼地勝來俊哲宋子今出宰公餘綴吟筆  
爛熳排珠琲又如崆峒兵百千森甲鎧寄我數十篇脩  
然起沉痾胷中強搜抉舊學久荒餒欲追天馬蹤騫蹶  
竟難逮撫卷懷昔游魂魄飛飄飄何當裂雲牋看君吐

江海

寄杭州天竺辨才大師

我聞辨才師解空稱第一  
病子得摩頂其疾頓若失  
救物運真悲了心非幻術  
聲名動寰宇退身愈藏密  
峨峨龍井峯篁竹不透日  
終朝無來賓筇枝自橫膝  
此道何寥寥差肩佛摩詰  
無生無不生一以貫禪律  
安得兩羽翰歸飛參文室  
稽首慕高峯天地相終畢

送外甥法真一師

仕祿不及養勇往學金仙棄家如脫屣壞衣披稻田見  
汝若見母令我涕泗漣我方齟齬時巨嶽遭摧巔汝母  
挈我往西江赴臨川愛育比其兒衣食無頗偏追隨二三  
載思親我言還是時汝未產顧今三十年汝壯我已老  
死者歸重泉悠悠記昨夢幻妄真可憐汝能逃世累趣  
尚固已賢京華勿久棲還當擇深淵返窮生死本勿為  
言句纏拭我衣上淚贈汝金石篇

送甥沈濟秀才下第南歸

炎風吹黃塵去興不可止  
丈夫固有命得失致悲喜  
何當永相將錫山酌泉水

送胡子企大夫還臺

聯鑣出梅山倏然二十載  
君常佐天府我遂泛雲海  
音書魚雁絕夢寐想風采  
營車忽來過笑詠珠璣  
故交悉相忘而君獨不改  
天生堯舜資化柄付良宰  
網羅收鴻鵠臺閣茂蘭茝  
君歸必殊顯發策救民  
痍形容八凌煙丹青永無  
浼使我觀太平白首甘凍餒

投宿繁昌徐氏水閣

東池種蓮子西池養肥魚  
盈缸釀美酒滿盤具新蔬  
客來徑一醉疑是桃源圖  
此事未足議弟兄皆業儒  
大弟已登科高名動鄉閭  
季弟復連薦豹變應時須  
長兄恬自養雲卧隨卷舒  
物至我則應隱德良有餘  
客有醉吟叟六月騎蹇驢  
避暑尋名山遂登君子居  
飲弄池上月一宿能清虛  
相看不相厭欲去且踟蹰

和姜伯輝見贈醉吟畫詩

蒼崖一萬丈中瀉白玉泉飛鳥度不得而我長攀緣洗  
盡心地垢吟成元化篇更復有何物一樽當我前忽逢  
姜伯輝爽量涵水淵開談了無迹所得全於天便欲脫  
青衫泛我江東船結交要終始相忘復顏然徑呼妙手  
畫秋江霜景全冰輪正卓午照影無頗偏誰能騎蹇驢  
世路空留連咄哉可以往揮手從飛仙

觀唐植夫所藏古墨

黑龍蟠黑雲久蟄黃金闕緣何落人間數餅若古月蝦

蝮不敢蝕利刀豈能截溫潤北方玉芬香麝臍裂乃知  
廷珪名桓桓久不滅植夫名世後彥範之子所蓄尤奇絕護  
以紫錦囊篋之復扃鐫渺思五季亂江南頗偷逸三主  
皆能書撥鐙聳瘦骨一朝歸大明流散餘故物金華座  
右銘清涼自題佛二寶藏子家時時一披拂及覩植夫  
墨清風愈飄忽異國想塵勞精靈豈沉沒聊為識古篇  
分手各蕭瑟

酬富仲容朝散見贈因以送之

牧之吟齊天太白詠秋浦至今三百年光燭不埋土我  
朝文愈盛往往出前古仲容生相門璨然鳳凰羽作鎮  
簿書閒盈編金玉吐牧之何足論白也真爾汝一朝解  
符歸暫泊采江滸肩輿過蓬華高談辰及午洗我塵坐  
聽不覺歡欲舞又如熟黃梁連食釋飢苦昔聞鄭國公  
片言戢外侮廟食配神宗昭昭仲山甫今逢族弟賢家  
法中規矩郎省寧淹回往自結明主不唯唐蕭家繼踵  
登相府請驅千里雲時作三日雨



宿鍾山贈泉禪師

夜半松柏響繞巖鸞鳳音披衣送遐盼明月方庭深樓  
殿遍瑤層寶塔棲中岑定分付刀尺世故仍癡淫六朝  
遺破塚四聖崇幽林香厨飯玉粒千歲聞於今况逢大  
道師妙傳諸佛心其徒五百人坐忘靜沉沉寶光泳琉  
璃永無塵垢侵何以明歸仰頓首興微吟

送倪敦復往池州決獄

忽領外臺檄離家不辭艱破雪涉遠道侵星出重關提

刀聊四顧決獄談笑間旦經五峯寺遂發九華山朗飲  
雲泉秀妙依松石閒琳瑯如得句先寄南風還

送敦復至觀音寺再用前韵錄別

大道既如砥安輿寧險艱通溝水決決出林鳥闐闐紫  
詔下天外黃氣生眉間歸當趨玉陛豈容眷名山接物  
齊彼分存誠肅吾閑我心如路草願君與春還

陶然軒呈孔掾

我醉不在酒心常醉於天出處無固必四時任陶然世

網誰拘拘冥鴻自翩翩隱几樂吾樂陶然名此軒採掇  
富菊杞芬香藉蘭荃啼鳥助春喜相呼語娟娟好風集  
清微時寫朱絲絃秋月瑩池上臘雪堆簷前客來亦把  
酒客去還醉眠為君發短調意將千載傳

安中尚書見招同諸公登雨華臺

城南五里近驅車稍停休層臺臨古刹欣陪清淨游凭  
高送遠目考古思名流更讀琳瑯篇叙事何其周尸黎  
與法雲接迹居嵩幽趣將金仙諧行匪邪徑由至今手

植松千丈騰龍虬悟發特異衆妙齡已依劉天華無根  
蒂應講來飛浮帝釋昔舉手此理誰可侔邇來表前蹤  
新亭壓黿頭空渚栖古月大江浴清秋曠懷出十地壯  
氣橫九州三山連天門水府卧金牛故國羅綺滅深宮  
榛莽留興亡千歲間愁緒如縲抽惟餘北嶺雲無心自  
悠悠高鴻正飛冥網羅安得收公等真丈夫問學皆淵  
丘不應持使旄歸合登瀛洲桓桓鼎鼎司落落金馬儔  
君臣若堯舜明良互賡酬胡為慕瞿聃玄微解而優願

舒三日霖慰此旱歲求乾坤涵潤澤使我醉兩眸咄嗟  
勿重陳玉樹後庭謳

送李嘉甫朝散還臺

春風連作惡吹雪深尺五元宵無燈火閉關與誰語忽  
聞營從過傾蓋挹眉宇相親如故人坐久加循撫蓬茅  
只數間餘無一丘土半俸足以飽未嘗詣州府白雲寓  
遠目清溪照靈腑趨閒已忘憂浩歌唯汲古名公志方  
壯富貴行可取協韻高才孰能當如羆亦如虎致君為唐

虞澤民作霖雨功名垂乾坤兒孫列簪組於予一何遠  
而能強相與聊書送行章欲以明出處

前春雪

玄冥奪春令連旬雪塞屋嗷嗷何物聲云是飢民哭來  
請義倉米奈何久空腹寒威如戈矛命盡須臾速憶昨  
去年水雲濤卷平陸高村既無麥低田又無穀民間已  
乏食租稅仍未足縣令欲逃責催科峻鞭扑嗟哉吾邦  
民何以保骨肉昂頭訴蒼蒼和氣待春育春工本好生

此雪無乃酷誰家敝園館  
草樹變瓊玉美人學回風  
歡笑列燈燭不知萬戶寒  
唯憂五更促世無採詩官  
悲歌寄鴻鵠

後春雪

前雪深尺五後雪深五尺  
動地北風惡連天凍雲塞  
通遠絕行人萬物同一色  
燭龍爪生冰陽烏背插翼  
牛羊何足論虎豹餓無食  
此雪昔未有父老均歎息  
況當長養時玄冥翻怒赫  
我欲請雷車夜半轟霹靂  
斗杓斡春

陽和氣隨甲拆溶為大田水青發隴頭麥南民少蘇醒  
白骨免堆積朝廷方體仁乾坤應合德有酒不敢飲獨  
樂神所責悲歌閉空屋寫慰同心客

送黃吉老察院

積學久未遇忠言今可施請君畧細故吐出胸中奇  
悉救當世弊自結明主知不唯振憲綱進當司鼎彝用  
廣財已乏官冗人愈卑政寬法不舉將悞邊無威家家  
侈聲樂淳源變澆漓土木絢金碧佛仙競新祠此乃腹  
心



疾豈止為瘡痍言者曾未及雖言多所私苟非大奸邪  
惡足求瑕疵舉朝無完人何以裨明時嘗讀喜似篇左  
右皆宜之乃知荆山璧天地終不遺去惡無變容誠明  
達神祇我方卧巖谷所友鹿與麋感君營從過枯木春  
風吹又如得黃梁慰我久苦飢承詔不敢留歡言遽睽  
違殷勤何以報報君以蕪辭

和敦復留題池州弄水亭

我寄江南隱數為弄水游讀君弄水篇感慨攀巢由赤

脚踏雲雨投竿翫汀洲鷗鳥不見猜飛舞相應酬誰傾  
百斛珠跳躑無復收一發海客秘儘副貧家求李杜縮  
光燭王謝慙風流開卷起予興飄欲乘桴浮如觀秋浦  
圖晚景入兩眸愛之不能捨飢魚適吞鈎嘗置几案間  
出沒窺竒幽一別幾何時歲月已十周跡滯若匣劍鏽  
溢不可抽何當隨君車吟哦與君侔

謝胡丞寄錫泉十瓶

怜我酷嗜茗遠分名山泉茲山固多錫泉味甘尤偏幸

遇佳客便十缸附輕船開缸漱清冷不待同茗煎想君  
民事休時時造泉邊入碾龍鳳碎浮甌乳花圓一啜未  
能止七盃誇玉川兩腋生清風飛逐蓬萊仙江心與谷  
簾較之孰為妍欲報吾子惠仍思陸生賢

謝魏戶曹惠酒

官醪不許買兵醞未嘗得愁殺避俗翁甘為獨醒客緣  
何魏夫子心仁生憫惻雙壺輒分送洎鱗被甘澤鐺杓  
再施設併欲醉君德百川供長虹叱吒天地窄儘從秋

來水大笑問河伯胡為辨牛馬灩灩浮月魄

川漲

朱夏久不雨川源倏然漲三潮渺相連狂風蹴高浪蛟  
龍遁出沒魚鱉隨浩蕩羣山悄低徊阡陌失背向嗟嗟  
圩中田一埂安可障去年已大潦十戶九凋喪幸賴官  
廩實罄罄命所仰官廩今已空農事未敢望理水竟無  
術祈禱俟靈貺退寸復進尺潮勢頗難量彼蒼罪斯民  
殺戮不以杖令人思禹功巍巍百王上

答魏掾招飲

我欲招魏子小山嘗白醪月華雖未滿已覺秋風高何  
物佐樽酌肥鱸併蟹螯一飲洗百憂軒冕稍可逃此語  
未及發辱君先見要乃知志趣同盍簪皆俊僚亦應喚  
舞娥紅雲欲飛飄不然避謗傷談話傾漁樵期歸一酌  
酹世事如芭蕉

酬彭法曹留題小山用次來韻

讀君小山篇語勢欲飛舞乃知甘與賈年少心則古

又如東方生用之必為虎予方坐空谷屏息避煩暑開  
緘揖清風不覺生毛羽携之出入間瑤池贈王母

送黃彥發還臺

予方寓小山感君忽相過風標奪瑩玉氣語排懸河君  
初佩金印治蠻真有科彼侮我即斬威行濟之和使知  
朝廷尊帖帖無愆訛聖主方求才四海張網羅麒麟并  
鳳凰所獲寧為多如君必見取為君吟菁莪

酬陳掾留題小山二首用次來韻

我愛小山石翩翩鸞鳳姿胡為不飛去似與幽人期志  
澤未及物收身聊自嬉不教三徑荒寧歌五噫詞舊交  
安在哉歲晏逢子知殷勤結惠好琅玕分一枝

茲山何亭亭鬱有高人姿朝容白雲過夜與明月期幽  
蘭翠碧秀好鳥鳴聲嬉更逢佳客來惠好留美詞遂  
令一丘樂能垂千載知殷勤謝陳子薰葭倚瓊枝

和陳掾劾陶齋

君欲劾陶潛超然異今趣開齋即吾廬欣欣同所慕潛魚不

羣游栖鳥不返顧無意亦無我何思復何慮遂趨羲皇  
上日夕自休裕百年能幾何不知歲云暮終當隨白雲  
悠悠此山去

喜鍾山泉禪師見過

聞師飛錫來七日遠輦飲欣諧清淨談中夜未能寢師  
提寶公刀為我裁古錦言歸不須忙溪上冰雪凜

送魏掾赴調

韶亂已承祿資賦況超邁三年瑩無疵一日欣有代芳洲



清風微夕浦寒烟霽翩翩莫能留逡巡遠山外浮生離  
合際志士懷耿介渺思歲月往俯眎天壤隘人驚甘羅  
少帝憶賈生對竟言若為期充實光輝大

送喻明仲朝請還臺

出馳使者星歲月一何久巨航始北歸華髮已盈首讀  
書過五車滿腹藏瓊玖行行赴金闕朝帝見太母乾坤  
運元氣斟酌須北斗願如范文正上疏發續黠明明納  
忠諫聖作古無有道行且寄書慰我窮老叟

送倪敦復朝奉還臺

有力乃致遠中道力不任言歸閉空屋敢復求知音君

來監郡務猥蒼一見臨稱褒借陽春片礫成寸金觴酌

每追隨嘯詠舒悰襟不覺三歲過啓櫂離江南

協韻

君懷

有玉寶未嘗獻於今於今不往獻千歲惜湮沉流景良

可悲鬢雪來駸駸前途漸就窄後會安可尋屋梁見落

月殷憂存我心猶期澤萬物霈然作商霖

邀敦復小酌為別

三年同賞梅梅花爛晴雪一日言北歸梅黃雨初歇誰  
將金彈丸綴在綠枝上結實勝開花邀君更同賞食梅齒  
牙軟銜盃奈離憂過江桃李熟回首憶梅不

送楊縝供備還京

伯玉弘農侯欣欣真丈夫首雖峨武弁滿腹藏詩書三  
年監郡兵一日云解符考之閭井言公廉卒如初未嘗  
害一物縱舍乃有餘我方卧空屋袒跣與世踈感君數  
相過晨坐定及晡新詩并美酒問遺無時無老境重可

惜遠別復何如羨君五福全客官奚拘拘子孫俱祿仕  
京城富園閭精神趁强健優游早懸車祝君可以歸為  
君吟歸歟

聽惠守錢承議談羅浮山因以贈之

久憶觀滄海喜君語羅浮浮從會稽來與羅相獻酬誰  
欲通兩山鐵橋跨山頭笙簫響瑤臺佛仙棲石樓靈光  
燭商舶七星被林幽飛泉難悉名異草香氣柔危峯聚  
白鹿深塢眠青牛葛洪安期生遺蹤尚綢繆攀巔瞰海

水湛碧纔一甌不見波濤翻颶風駕龍虬又云朱明天飄  
然落遐陬方廣吞五嶽盤紆臨十洲不得預封禪自起煙  
雲羞此理固莫測勝境輸君游君語洗我耳我詩瑩君眸  
羅浮杳何許為我商聲謳

送錢節七承議還臺

平昔未識面已景才業殊及來公誦家把酒情忻如分  
携八換歲益聞峻名譽我方姑孰隱君解惠國符鷁舟  
始云泊駕言過茅廬傾談洗塵聽積憂令我舒鳳窠無

凡毛龍窟多美珠朝家正清明往矣涉亨衢澤民冀姚  
宋致主優唐虞史筆採循吏非君復誰書

自釋二首

去日不可追來日已無多衰頽復自念遷謝當奈何賢  
達并賤愚百歲同消磨不如寄觴酌徘徊眄庭柯流翠  
自成幄好風時經過憎愛理兼忘虛淡神所和運盡即  
隨盡葬骨南山陂

遭時如堯舜擊壤歡且歌歸田尚叨祿天寵固已多敢

復邀長年寓景隨流波有酒即觴酌風日眷清和俯悲  
秦晉士含飢避干戈

青山集卷六



謹案卷五第七頁前三行了無人世喧原本喧訛  
誼今改

第十頁後五行明珠混野芡原本芡訛茨今改

第十九頁後六行名探其姓岑原本姓訛妙今改

卷六第三頁前四行石壁露璨璫原本璨璫訛璫

璨依本韻改

第六頁前二行乃知廷珪名原本珪訛邽據聞見

後錄改

欽定四庫全書





總校官進士臣胡榮

校對官編修臣裴謙

謄錄監生臣金士虔

欽定四庫全書薈要

集部

青山集卷九

七至

詳校官助教臣常循



欽定四庫全書薈要卷一萬五千九十八

集部

青山集卷七

宋 郭祥正 撰

五言古詩

志士吟二首

羣材

一作士

欣向榮志士寂無託獨鳥千里飛天末孤雲

泊越女殊西子秦聲異別鶴守貞不辭貧怡怡內常樂

高歌憂金玉其聲震寥廓

歲華忽已晚志士將奈何推車眷前修停澤無餘波知  
命守窮賤脫屣南山阿出從麋鹿游坐與猿鳥歌採菊  
復採薇聊以養天和

聞砧

天潢轉斜白庭菊汎團露紈扇辭玉纖雲幄含幽素濕  
螢遞疎牖寒螢鳴外戶南隣發砧響涼夕敢虛度不作  
舞衣裳為君理繒絮邊磧多苦寒先秋寄征戍

秋扇

輕素裁團扇投君掌握中為君却煩暑動搖挹涼風一  
朝霜飈至羅幃衾被重辭君且屏跡棄置隨斷蓬物理  
古如此用捨安可窮願君千萬壽執熱還相逢

賞蓮

濯濯水中華香艷勝蘋藻英英泥中根絮素常自保花  
房又堪食無一不為好乃知金仙經譬諭肆論討游宴  
集賓僚賞詠固宜早一朝霜飈至莖葉變枯槁抑亦如  
佳人妍媚忽衰老顧眄豈復憐棄置不足道幽懷向君

開芳樽為傾倒木末誰能搯愁煙起孤島

將至金陵謁曾子開侍郎

秋空久不雨漠漠風卷沙胡為起高興昨夜辭山家明  
投金陵郭府觀凌紫霞公解豫章榻我停銀漢槎一傾  
別後言電電鳴交加借公口中春發我枝上花又如出  
地雷空山走龍蛇公能結明主我亦思無邪但驚岐路  
別進退各有涯浮生能幾時鬢髮忽已華會合豈易得  
兵厨酒仍佳慎勿學謝安捫涕空感嗟



雙泉軒贈太平守梁正叔

開池得雙泉因泉構華屋池中種菱荇池上列花竹與  
春蘤新紅遇風搖淨綠輕鷗自飛舞纖鱗隨出縮操舟  
往江海端憂龍蜃觸卷衣入山林而防虎狼欲豈如一  
凭欄俯仰快心目朝吟吟有餘暮醉醉不足雙泉長涓  
涓比公享天祿公歸民懷公聽我雙泉曲

徐子美楊君倚李元翰小酌言舊

南方多苦熱北地尤苦寒徐子掾招宜七載濱夷蠻楊

李仕并代毳裘霜雪殘一朝相續歸相看涕洟瀾捫涕  
喚家僮草草羅杯盤念昔共庠序垂髫競癡頑及今過  
六十各各嗟衰顏光陰信如馳生死無百年妻兒半凋  
喪少喜多憂患吾方慕陶潛行歌眷南山山氣日夕佳  
吾廬未嘗闕猿鳥相與居絲桐時一彈三子方急祿遑  
遑未能閒努力佐州縣須防官長難暫當陪我醉餘事  
不足言

寄題九江陶子駿佚老堂

未老已先佚構堂名佚老與其寵辱驚何似歸來早淵  
明乃吾祖此道能自保歸來無一事時時為酒惱紙帳  
春風融不寐聽春鳥闕闕枝上語報我竹間曉我醉未  
能起爾音一何好却笑世間人忘憂種萱草

復雪

連朝雪復雪吾獨擁紅爐樽中亦有酒不為飢寒驅目  
前奚所憂所憂在村墟去年旱蕪水二稅多逃逋十家  
九乏食往往死路衢空山嗥虎豹深淵卧龍魚飛鳥各

歛翼康莊斷行車倚門獨悲歌陽氣何時舒

將至壽陽謁朱行中龍圖作

魏臺公送我春風花落盡壽陽我訪公蕭蕭朔風緊且  
復念殘年鬢髮安得鬢高才久外補惠愛益不泯聊歌  
古柏行歌罷仰天哂長淮白魚肥冰壺酒堪引

暮春之月謁廬守陳元興待制作

百年憫秋霜念念流運歇一昨辭周行於今鬢垂雪幽  
獨誰為扶寸心徒自折翻然駕柴車賓閣重款謁與公

論襟期及此陽春月  
英英欄中花滋露正妍  
發濁濁瓮中醪浮醅  
想芬冽朝廷用直道  
郡邑罕所關  
嫵婉我之友  
皎若環與玦  
良辰不同樂  
衰暮空惜別

廬陵樂府十首

妾擡纖纖手一拂白玉琴  
琴聲寫三疊寄妾萬里心  
朱絃斷可續妾心常不足  
纔驚楓葉丹又見楊枝綠  
望君君未到妾貌寧長好  
雲鬢懶重梳從教似秋草

鴻鴈殊未來思君一彈琴  
泠泠別鶴語折盡幽蘭心  
蛛

絲漫相續難繫驂騑足白日無時停雲鬢寧長綠年  
華要不老不若丹青好對之雖無言猶勝種萱草

與子初執手効彼瑟與琴子去既不返誰復知我心寶刀  
能切玉願斷金烏足留住枝上春花紅葉長綠懊惱復  
懊惱憔悴變妍好不見庭中蘭埋沒隨百草

妾身厭塵埃專心托君子感君一迴眄涸轍逢秋水雍  
容未經年結誓同生死胡為忽言別短書無一紙愁思  
魂夢飛鵲語不成喜歲晚君不來紅粧為君洗

嗟峨姑射山綽約飛行子絳唇啓皓玉明眸漾寒水方  
平與麻姑相期永不死手披黃庭經金字寫青紙胡為  
謫人間離合溢悲喜妖桃凝露珠東風任吹洗  
庭下幽花冪寒霧金鴨冷煙無一縷從君別妾駕紅鸞  
望斷三山無覓處平時曲調休重舉長袖空垂不成舞  
醒眼牽愁送春去獨立殘陽與誰語

英英玉山禾乃是鳳凰食鳳凰殊未來禾生亦何益幽  
香眷春盡孤根含露寂委棄同蒿萊咄嗟人莫識

自君之往矣幽房守歲華  
眉頭勻翠淡裙帶縷金斜  
魂魄空成夢音書不到家  
憑誰度庾嶺和淚寄梅花

粉黛元知假丹書豈是真  
桃花初過雨溪水暗流春  
眼隨雲斷書書托雁頻漁  
郎自迷路枉殺武陵人

不作巫山雨螺川久住家  
欲知冰未釋須信玉無瑕  
對局拈棋子開牕摘杏花  
誰能諳此意紅日又西斜

妾薄命

雌鳳始營巢妖桃半數萼  
憶昔嫁君時相逢一何樂  
朱



顏妾未變白眼君先惡君恩不下濟妾意正難託空床  
春寂寥孤燈夜蕭索哀絃時一彈彈終淚還落

怨別二首

渡江君別妾恨不如桃葉桃葉解隨君渡江不用櫂妾  
既不得隨渡江櫂如飛自憐妾命薄江頭還獨歸一步

一回首碧雲凝落暉空將盈掬淚和粉洒羅衣

古詩云  
桃葉復

桃葉渡江  
不用櫂

團扇不遮面欲君永相見胡為忽別妾舫逐南風便君

行妾獨處妾復誰為主正似晚春花零落隨風雨有情  
頻寄書莫令書更踈却羨路傍草到處逢君車

古詩云  
團扇復

團扇團扇遮人面相見  
不相親不如不相見

代古相思

妾面如花開妾心似蘭死花開色易衰蘭死香不已願  
持枯蘭心終焉託君子君行胡不歸兩見秋風起鴻雁  
只空來音書無一紙夜夜夢見君朝朝懶梳洗不憶霜  
月前絲桐為君理千古萬古悲悠揚逐流水

追和李白姑孰十詠

姑孰溪

源從丹湖來奔流朝北極  
雙橋跨長虹千艘濟民食  
日華動清曉岸柳搖行色  
文王未出獵垂竿人莫識

丹陽湖

湖光際長天永日微風止  
菱歌一舟去雪陣羣鷗起  
荷香迷近遠秋色瑩表裏  
試問賀季真何如鏡湖水

謝公宅

山腰存廢址昔是玄暉宅林藏幽鳥聲月弄野棠白高  
賢百年盡遺事千古積此興欲誰論摩挲問磐石

凌歊臺

高臺築千尋勝景供遠目雲煙護城郭吳楚接川陸不  
知歌舞散雌鳳叫空竹鬼火照殘碑應有精靈讀

桓公井

環營鑿九井井深泉不竭舊甃缺瓊瑤新苔荒歲月重  
吟太白題興自桓公發我欲喚常娥團圓伴澄澈

慈姆竹

一種碧琅玕攢根繞蒼島濃陰不透日密幄得春早笙  
隨緱氏仙鈞入蟠溪好欲識化龍蛇唯應雪霜保

望夫山

登高望天涯化石與君別秋鬢霜露深春衫薜蘿發旅  
雁只空飛悲煙長不絕行客歸去來芳心可休歇

牛渚磯

長江瀉危磯雷怒安可向煙雲忽藏月鯨鯢互噴浪朱

衣叱犀火丹青豈能狀引盃聊醉吟徑卧巨鼇上

靈墟山

仙人赴金闕靈墟躡高路空見白雲飛想乘黃鶴去月  
冷步虛壇苔深煉丹處塵寰欲何為光陰等閒度

天門山

巨靈擘蒼山勢分金闕對月引曉嵐交江翻寒影碎雙  
鳬落人間千帆出天外我欲往高吟凌虛踏煙靄

追和李白秋浦歌十七首

碧水碧如靛染成秋浦愁長橋通驛道危堞起朱樓蕩  
漿誰家女菱歌自風流江心雪浪湧知解渡江不却羨  
雲中雁低飛過北州

比夕宿秋浦蕭蕭古岸頭白雲和月散江水晴空流不  
及水中鳥隨波上下游客情須自遣知命適虛舟

水晚舟楫止山寒猿狖稀雖憐秋浦好未敢濯征衣  
霜落荻洲晚水殘魚市衰唯逢採荷女素手理輕絲  
莫聽猿夜啼莫看蘆花雪倦客多少愁離家八九月

水有錦駝鳥山多杜宇花扁舟投夜泊來自長風沙  
秋水適瀰漫寧分馬與牛酒樓翻擅價不當白狐裘  
秋浦試北望參天九峯奇緣何謫仙客名作碧蓮枝  
萬丈水車嶺還如九疊屏北風來不斷六月亦冰生  
捨檝乘籃輦十里穿松林悲風西北至千山龍鳳吟使  
君如杜牧方有愛山心

齊山一百洞咫尺接危梁雨過頻登望逼人松檜香  
清溪十里岸蘆花八月天不惜錦袍濕應須櫂釣舫



秋浦勝姑孰白鵬無數飛謫仙如得句須換一雙歸  
老謝奪秋景橫卷披雲煙寓目不知遠何須家輞川  
鏡潭弄秋月始知秋興長金龜能換酒客鬢不嫌霜  
半空紫微亭翫月動經宿更待雨中來林林看銀竹  
秋浦一何好名因太白聞溪山圍市井鼓角下煙雲

舟次新林先寄府尹安中尚書用李白寄楊江  
寧韻二首

金陵龍虎國況與王謝期掛帆須一往願借天風吹昔

解徐孺榻別來勞夢思鍾峯當北戶浮玉出東池柳青  
白下門鷺棲瓊樹枝但對樽中物何嗟鏡裏絲如聞紫  
泥詔起公翊明時霈為天下霖一洗旱暵悲請歌甘棠  
歌翻作新林詩

休居尚蒙祿願赴興龍期況此孱病姿感公久嘘吹相  
望止百里株坐徒傾思呼僮刷鶴羽駕言別清池往  
將投新林新林有高枝仰聽鸞鳳音軋軋如抽絲窮陰  
欲雪天燕雀無聲時接物伸妙理運心廣真悲如何持

一盃要我百篇詩

舟次白鷺洲再寄安中尚書用李白寄楊江寧  
韻二首

白鷺飛還集新沙沒故洲山形龍晦角江氣蜃為樓欲  
問前朝事空懷去國憂鐘聲萬家曉霜葉半城秋化值  
唐虞盛人逢王謝流徐生思解榻兵醞可銷愁

終朝蕩雙槩夜泊碧蘆洲重城已在望聞公宴層樓華  
燈燦繁星浩歌正忘憂賓朋集珠履佳節臨千秋

謂近興龍

節

願言刷微羽一飲清泠流舉目送高鳳蕭韶洗民愁  
奉同安中尚書用李白留別王嵩韻送毛王仲  
大夫移浙漕

春岸草回綠春江日浮金蘭舟忽言發芥蒂悲我心  
藹藹松栢友雍雍鸞鳳吟願同三歲遙毋使離別侵奈何  
千丈材亭亭不依林眷為九重知移節宣德音遂令帝  
王澤深於太湖深豈同失羣鶴飲啄憐空岑誰將勞勞  
歌一瀉無絃琴

將游宣城先寄賈太守侍御用李白寄崔侍御

韻

嵯峨敬亭山玄暉有佳作賈公乃後身風流今與昨  
冠觸姦邪分符宛陵郭江湖暫徘徊煙霄必騰躍予方  
卧間雲時或乘皓鶴水縮龍蜃歸霜清天宇廓安能坐  
隴畝淒淒眷藜藿陳蕃有虛榻黃埃侵斷索能如汲黯  
直定許季生諾往哉不可失行聞還鳳閣

追和李白宣州清溪

清溪安在哉欲弄清溪水更邀琴高生携竿會於此日  
落翠屏間鷄鳴桃花裏不見避秦人誰嗟遠游子

留別陳元興待制用李白贈友人韻

沉吟澗底松不及堯階草不經君王顧枉被風霜老弱  
羽戀一枝敢思浴天池聞君有餘力何惜一噓吹青雲  
與黃壤回首隔追隨

留別宣守賈侍御用李白贈趙悅韻

賈誼幾世孫閑邪誠所存一登御史府直氣壯中原五

載三去國士論皆騰喧浩養固無害宣城況名藩下車  
究積弊摘節仍除根乃遷孔子學方庭樹蘭蓀講解得  
董生思單先聖恩軒軒慕高第各各不窺園修橋濟行  
邁掩骼招旅魂蕭蕭囹圄空清風時掃門尋山出近郭  
玉舫紅浪翻誰為坐上客能酬謝公言自愧翅翎短謬  
參鴻與鵠不有瓦礫賤那知圭璧尊矧由半面雅歲久  
情愈敦三章寵新作詞源何駿奔幾欲效長吉微吟謝  
高軒霜威信凜冽即之自溫溫又如太古鏡磨開蒼蘚

昏肝膽悉照徹魑魅安敢論行聞紫泥詔沙路馳歸轅  
宜容隱巖子留連愛石盆看君揚大翼北溟終化鯢而  
我隨白鳥丹湖往孤騫

追和李白郎官湖寄漢陽太守劉宜父

遷客昔登覽愁煙靦四隅身趨夜郎道心戀咸陽都此  
景古來好此人今則無空餘秋夜月素影湛平湖便欲  
凌風去酣歌與君俱

題化城寺新公清風亭用李白元韻



唐時升老亭剪棘今重開南瞻峨嵋闕北峙凌歊臺新  
公將家子為僧亦多才譬彼獨鶴唳安用羣鷄猜或彈  
玉軫琴傾耳濯纖埃清風不知處冷冽時時來吹雲雲  
窈窕吹月月徘徊幽人許共賞渴心咀珍梅了然得真  
味塵魔自崩摧令妖人豪俊書名駭奔雷  
其妖冲雅善  
草書名重天  
下 禪談屢終夕茗酌無餘盃還歌太白篇事往良可哀  
古今儻同轍浩氣不寒灰

太守陳侯見要登黃山送馬東玉遂用李白登

黃山送族弟濟赴華陰韻呈陳侯并送東玉

潁川賢大夫虛懷蘊虹霓雖分銅虎符合在帝苑棲邀  
我登黃山攀雲絕長梯霜林正搖落寒鳥鳴慘悽金牛  
飲空渚天鏡開峨眉塵埋宋武妓蘇剝開元碑謫仙送  
客處魂斷白日低松梢想獨鶴軒昂避羣鷄還思北溟  
釣赤脚蹋鯢鯢時窮壯士恥思遠騷人悲且舉一盃酒  
肯分雲與泥坐有北歸客張帆震雷輦往獻白玉璞不  
憐紅粉啼薦章已交達高名動朝閨君相必見收煙霄

速橫飛盃停可以起看君開羽儀

盛仲舉秀才歸自九華極談勝賞亟取李白九  
華聯句元韻作二首誌之

客從青陽歸為我談九華雪潭昨夜宿衣上有殘霞鳴  
溜隔深木白鵬栖翠崖南游豈是遠乘興必携家  
昔號九仙子今名九蓮華差差浮碧海葉葉散晴霞積  
靄迷金寺飛流濺雪崖開簾陪岸幘須覓夏侯家

青山集卷七

欽定四庫全書薈要卷一萬五千九十九

集部

青山集卷八

宋 郭祥正 撰

長句古詩

送朱王二秀才歸江西

冰霜凍海海水黑雲霧崩騰太空塞  
飢猿哀啼虎噤嘯  
高鴻折翅鷹斂翮  
苦寒太苦吾正愁  
二子胡為千里客  
自言失意西南歸  
十斛明珠已空擲  
廬山摩天瀑布雄

請把肝腸洗愁寂

送沈司理赴闕改官

捕寇治獄皆有聞才力縱橫真出羣薦書交上三歲滿  
玉陛引對瞻吾君胸中策畫爛星斗筆寫紙上虬龍奔  
完創補弊有至理此時岐路竿青雲雲霄問誰作霖雨  
願洗邊城血中土和氣油然熟禾黍天下蒸黎免窮苦  
男兒事業當致主我獨沈溝亦無語離亭愁懷安可數  
春風自在花飛舞船尾插旗幟畫鼓摻袂青山遮別浦

送方奉議倅保德

彥德

太行積雪三千尺，渾河連天厚冰塞。  
天台詞人不畏寒，攜家直赴并州北。  
越羅蜀錦置筐箱，狼帽氈裘付妻息。  
邊城雖道無戰塵，塞草從來少春色。  
馬上題詩泣鬼神，何時歸奏平戎策。  
我欲為書叩相閣，喚取斯人侍君側。

送王主簿棄官歸建昌

老着青衫羞望舫，自笑風船禁不得。  
拂衣高詠歸去來，我有麻源三畝宅。  
朝食太陽茹紫芝，時時更作方平客。

肯嗟垂索少黃金兒孫只用傳清白

送陳大夫罷太平守還臺

去年秋暮送東玉今歲春殘送予儀人生不老安可得  
況復年年傷別離請謁湓江初識面已知磊落胸中奇  
桐鄉之會愈相樂是時解印予言歸公乘扁舟過溪口  
殷勤訪我論新詩君章下車始命客邀公與我同遨嬉  
開懷醉倒信莫逆十年一夢音塵稀忽聞公來守吾土  
餘生幸獲仁賢依政成無擾威惠浹白駒馳隙臨瓜期



梨花奪月爛銀白  
鱗盤縷玉江魚肥  
酒傾碧盞盞嘗滿  
曲度晴雲雲不飛  
車輪未許生四角  
且願逆風東北吹  
留連更盡一壺酒  
無使醒淚沾行衣  
十科應詔公第一  
出入省寺非公誰  
欲陪後會定何許  
吐嗟自此分雲泥

峨嵋亭即席再送

是歲二月上有  
賞花釣魚之宴

長江奔來一山裂  
兩岸崔嵬聳雙闕  
石人空老薜蘿衣  
夜夜孤猿嘯寒月  
斯亭誰作名峨嵋  
輝翠含愁惜離別  
浮生後會難再得  
況復相看頭雪白  
停盃執手聊逡巡

畫鼓銅鈺莫催客客行西望紫皇家紫皇真人駕龍車  
海若驅鯨上金鈎玉女挾春粧寶花千官稱觴祝天壽  
簫韶九成奉肴酒青霄潤步隨鸛鷺肯向江頭戀楊柳  
柳花飛春日遲登峨峩兮送君歸

留別宣城李節推

獻父

君作宣城幕下吏我嘗築室青山址三四相逢五六年  
交情淡若秋江水水流到海無窮時吾輩論交無衰期  
明主可結亦未晚謝安四十今非遲低頭感事復太息

汲汲功名亦何益君不見屈原言直沈湘水韓信功高  
亦誅死窮達無過數十年事業空存一張紙不如飲酒  
臨春風溪水綠淨山花紅金絲玉管亂兩耳一醉三百  
琉璃鍾醉來辭君登海槎四方上下皆吾家

投別發運張職方

仲舉

蕭蕭乾葉欲辭柯曉來更奈嚴霜何明知飄泊不得已  
諸君試聽離人歌生平學盡經濟策宗工大匠親琢磨  
三入長安獻不售困鱗悵望西江波感君聊借一盃水

六月炎蒸免枯死高談雄辨為我傾古恨今憂對君洗  
賣薪歸家妻子羞淮陰胯下未封侯故人騎龍不相助  
子陵自欲追巢由拔山力盡真可傷江湖安得重相忘  
恩仇必報乃壯士如今孰是韓張良玉手纖纖把金盞  
更聽新聲碎瑤板醉鄉酩酊萬事休功名難成歲華晚  
噫吁噓秋風已老白雲飛鄉關咫尺未能歸倚瑟而歌  
悲帝子南山遙望淚沾衣願君聞此頗矜惻許借長帆  
還澤國他日堯階薦姓名投老猶能奉鞭策

酬吳著作

子正

醉乘黃犢窮山河倏然遂向桃源過桃源盡處見城郭  
萬家訢訢聞絃歌主人喜掃溪上榻愛我鬢髮塵埃多  
旋呼瓊液注玉斚麟孫出拜能吟哦使令勸我須醉倒  
不知與世為誰何醒來忽別未十月敢期佳句傳靈波  
千年不落一字俗凜凜秋風吹太阿大才小用小有補  
牛羊茁壯餘無他何時赴詔玉京去萬物待子能調和

康王洞呈同游訥禪師

康王洞口無塵埃青山嶄巖水迢迢飛橋百尺渡天險  
下聽谷響如奔雷凭欄要識物外物沈寥寥兮何有哉  
但見東阜聳樓閣碧瓦鱗鱗而崔嵬虹電披猖雨新歇  
金雲點綴芙蓉開斜陽疎光照不入異景萬變誰能裁  
仙家遺象已可愛是時況與禪宗來瞳人照耀骨森竦  
皎如皓月凌寒梅險句卷起谷簾水真珠萬斛收蒼崖  
猿不能啼鳥無語巨石枯木為之摧達即善用用即妙  
斯游何異登蓬萊回頭碌碌利名士日蠹日朽令人哀

酬李推官淮上見寄

霜寒水落平沙露短艇悠悠尋泊處驚弦旅鴈失羣飛  
貪餌修鱗隨網去世情翻覆可沾巾三千食客背田文  
不須更待年華老便向東山卧白雲

南雄除夜讀老杜集至歲云暮矣多北風之句  
感時撫事命為題篇

歲云暮矣多北風怒嘯萬里吹驚鴻只今我亦在行旅  
陟彼庾嶺臨蒼穹霜寒不復瘴霧黑酒賤頗得樽壘紅

鼓角看看變新律燭淚璀璨隨殘冬一階寄祿百無補  
白髮又送年華終申章雖獲萬國賀防邊未可旌旗空  
中原將帥誰第一願如衛霍皆成功廟堂赫赫用耆舊  
熟講仁義安羌戎我甘海隅食蚌蛤飽眎兩邑調租庸  
嗚呼不獨夔子之國杜陵翁牙齒半落左耳聾

廣州越王臺呈蔣帥待制

番禺城北越王臺登臨下瞰何壯哉三城連環鐵為甃  
睥睨百世無傾摧蕃坊翠塔卓椽筆欲蘸河漢濡煙煤



滄溟忽見颶風作雪山崩倒隨春雷有時一碧濤萬里  
洗濯日月光明開屯門鉦鐃雜大鼓舫船接尾天南回  
斛量珠璣若市米檐束犀象如肩柴越王胡為易馴服  
陸生辯與秦儀偕當時貢物竟何有漢家宮殿今蒿萊  
邦人每逢二月二熙熙載酒傾城來元戎廣宴命賓客  
即時海若收風霾羣心愈喜召和氣百伎盡入呈優俳  
樂聲珊珊送妙舞春色盎盎浮樽壘鬼奴金盤獻羊胾  
薔薇餅水傾諸懷嗟余老鈍已茅塞坐視珠履慚追陪

青蠅何知附驥尾伯樂底事矜駑駘番禺雖盛公豈愛  
亭亭自是巖廊材千年故事寫長句指畫造化回枯荑  
昌黎氣焰遂低縮瓦礫未足當瓊瑰仙姿勸公莫妄想  
元鼎久待調鹽梅

蒲澗奉呈蔣帥待制

菖蒲澗底生九節流水遂作菖蒲香安期服之已仙去  
漫脫雙鳥留秦皇秦皇殺伐自無度年齡社稷何由長  
蓬萊畢竟不可見十祠千載聊相望散髮追之又無迹

後來詭譎傳崔郎至今正月二十五城北夾道珠簾張  
元戎要賓鉦大鼓老蠻獻饌燒肥羊傾城盡作蒲澗飲  
美俗眷戀神仙鄉穿雲絲竹度別浦遶山金翠明殘陽  
我乘欸段到已晚越臺僅得參壺觴公攜大句使我讀  
氷漸憂齒清琅琅張侯繼作亦精敏蘭茝相倚傳芬芳  
却尋陳事考僭迹粵佗稱帝銀稱王基山控海恃遠嶮  
大明一出旋消亡豈如戴主効臣節白骨雖朽忠名彰  
只今神孫太母聖天下擊壤歌時康佳期不邀墓中鬼

樂民之樂真循良勒詞蒼崖告萬古蒲澗之會無淫荒  
石屏臺致酒呈蔣帥待制

石屏臺下玉池水遶岸石屏青齒齒鑄劍初自人力成  
一石十牛車不起輦置應須費萬金園囿森羅供宴喜  
蒼蘚昏埋歲月遠修藤纏絡根相倚劉鋹族氏已無餘  
此物猶存舊基址曾經戰鼓轟雷霆屢對春風閱羅綺  
老榕交陰不透日客袂生寒冰雪洗小橋斷處棧梯連  
一綫崎嶇劣容跬未知深窟藏龍蛇但見枯荷閣螻蟻

摩挲題字考前人名姓班班少奇偉請公椽筆賦大篇  
歌頌承平誅僭擬光焰須令萬丈長一時行樂何足紀  
朝漢臺寄呈蔣帥待制

鹿入望夷秦欲滅真劍先流白蛇血尉佗推髻爾何為  
漫占海隅蛟蜃穴祝融之符天下歸豈假陸生三寸舌  
千金裝橐未為多更上高臺拜堯闕至今人說朝漢臺  
不知此地藏蒿萊使君好事一登賞譬若古鑑初磨開  
香爐煙生石門曉三山翠擁浮丘來風松自作笙簫響

金史四  
卷八  
暮霞却捲旌旗回長空無礙鳥無跡人事寧須問今昔  
瓊漿且泛琉璃船滿眼夕陽留不得登臺何似登金門  
爛吐文章侍君側願公歸作老姚崇莫學江東窮李白  
次韻和元輿待制後浦宴集三首

往歲遭風洞庭浦悔不攜鋤徙老圃昨日金城逢故人  
萬丈虹蜺思一吐更在芙蓉池上游桂枝為櫟木蘭舟  
舞妓相將權歌去疑是西施浣紗處皓腕翩翩雪藕絲  
婉若游龍或驚鶩願公對客少留連早晚沙堤問歸路

欲飛太白嫌秋暑約我留連菊花圃

公詩有插盡黃  
花君上路之句 擷

芳持酒聽君吟冰絲軋軋吳蠶吐只今且挈茗盃游滄  
浪同泛採蓮舟君當復入玉堂去為吾還思採蓮處葉  
間爭看戲鴛鴦花底誰曾愛鷗鷺柳州煙島自迷人員  
嶠方壺豈無路

誰為宓妃尋洛浦且看芙蓉照秋圃爛熳折隨羅袖歸  
芬香忍對西風吐官池不屬野人游畫鼓喧喧駕鷁舟  
賓從欣陪使君去筵開正在紅雲處

謂之花島

獨攜椽筆發

清唱老鶴昂藏映雞鶩敢辭倒載委藍輿絳蠟行行  
杭音

夾城路

和懶散贈萌公

萌公家在東園隅世族蕃衍今仍孤平生嗜酒少知者  
請說懶散提攜初杖頭世界迷日月豁然心地無榛蕪  
人人未飲公輒醉坐卧只與樽壘俱革華開口洩上旨  
毛穎禿髮非中書貪官雖得後乃辱智慮可惜于身疎  
豈如萌公泛滄海不用鼓枻并乘桴蓬萊頂上受玉液



酣酣至樂忘榮枯  
劫火任滅公未醒  
不復願進承明廬  
承明侍宴盡金玉  
君豈有意來相呼

魏武廟

濡須山頭祠魏武  
炫轉紅裝按神鼓  
蘋藻盈筐酒滿樽  
呼吸風雷激春雨  
田疇高下春雨平  
操牲飲福羅中庭  
吞吳成魏運歸晉  
血食猶參社鬼靈

向舜畢秘校席上贈黃州法曹杜孟堅即君懿  
職方之孫也

青天無雲日華滿小妓樓中吹玉管卷簾不信夜霜寒  
熏蘭酌桂肌膚煖黃州之客最少年醉來口角傾詞源  
驚龍掣電繞滄海沙場陣馬成功旋殿賜新袍織春草  
水溢雙瞳犀插腦壯圖佇結明主知帶束黃金應未老  
宣城憶拜乃翁時幕中珠履皆雄奇至今名姓記僧壁  
當年已識麒麟兒嗟予老人日零落兩鬢衰蓬眼生膜  
寸心猶欲慕夷齊險路無緣攀衛霍邂逅桐鄉逢故人  
槐槽瀉釀追陽春形容若畫凌煙閣第一江南尋隱淪

清明望藏雲山懷舊游

憶昔清明出郊去藏雲寺前花正開  
蜜蜂銜蕊異香散時時灑面微風來  
溪泉甘滑碧玉色晴山倒影無纖埃  
紅粉佳人十七八踏青唱歌雲鬢頽  
黃犢行牽載酒瓮到處便傾三百盃  
或逢濃陰藉草坐口橫玉笛吹落梅  
傍人問我樂何事我心無事同嬰孩  
誰令束帶入官府觸網修鱗難再回  
清明依舊好時節朱顏憔悴無由陪  
藏雲之山亦非遠隔江東望青崔嵬

青山集卷八

欽定四庫全書薈要卷一萬五千一百

集部

青山集卷九

宋 郭祥正 撰

長句古詩

游道林寺呈運判蔡中允昆仲

如晦

用杜甫元

韻

長沙城西湘水隅道林古寺松門紆  
嘗聞秀絕超五嶽  
果見氣象吞重湖  
殿前銜花走白鹿  
殿裏沈煙焚玉爐

何人塑出慈氏象冠纓動活搖明珠高僧處處有遺迹  
盤石坐禪龍虎俱唐人妙筆數歐沈至今板上棲羣鳥  
五言七字又奇絕此寺此堂天下無不緣薄官豈能賞  
勇往兼有兒孫扶賈生前席竟憂死屈原懷沙終自誅  
投身及早卜幽隱淡泊久乃勝甘腴雲生岳嶠月晦影  
雨過橘洲猿夜呼細吟靜境足自適忠憤未合思捐軀  
趨玄飽讀長者論養真默合煙蘿圖千篇愧比老杜老  
一節願隨孤竹孤况陪使者共游覽二謝弟舅真友于

不知昔日楊常侍何似今朝蔡大夫

舒州使宅天柱閣呈朱光祿

羣山奔來一峯起千丈芙蓉碧霄倚嫦娥却月愁推輪  
王母呼煙結繒綺分明有路金闕通翠滑無塵玉壺洗  
老松自作孤鳳吟駭浪時翻三井水我媚絕巔安足論  
力不擎天亦徒爾懊惱茂陵客白日求攀天遺壇猶在  
半蕪沒隱約龍馭回瑤鞭直至唐家六皇帝夢感異境  
開重玄真符預告後五百佐佑寶歷推鴻延城頭建閣

舊丞相牕戶再新光祿賢手攜大筆恣吟覽老句氣焰  
摩星躔當時數赴范公辟秀骨照坐誰差肩功名自許  
出絕域歲月漫往修途遠丈夫有命豈嗟感投老得地  
多雲泉霜柑正熟蟹螯美白蟻旋漉浮金船伊予困躋  
坐小邑悵望珠履叅華筵祝公自此早歸隱幅巾藜杖  
詩中仙

中秋登白紵山呈同游蘇寺丞

平湖萬頃浮青玉嫦娥更攬寒光浴天高星稀魚雁沈



風靜雲消絲管逐試聽郭子今宵歌對月不飲奈愁何  
上盡高山萬丈之絕頂側身可以攀明河明河洗君耳  
明月照君面暫來空洞無物逍遙鄉安用聲名誇海縣  
前年從軍梅山下林黑只憂偏弩射去歲點夫大河北  
黃土吹衣無晝夜勞勞功業安在哉出林之木風先摧  
有言不得見天子卷舌却出金門來流光差池鬢垂雪  
幸對南山值佳節更在桓公游處游自紆悲歌再清越  
登高何必須重九零落黃花汙濃酒豈如桂子散秋香

承露金人舉纖手舉纖手欲未休月輪忽轉西山頭明  
年此會定南北沈思使我增離憂荆榛滿眼世路惡恩  
亡水覆終難收田文昔日三千客去住如今均一丘噫  
吁噓達亦不足恃窮亦不足羞但願明月照我酒古來  
秉燭供遨遊因誰為謝北海若酩酊不辨馬與牛

登王知白秀才跋賢亭呈同游余萬二君

鑿山構亭鄰北郊志慕賢哲忘喧呶豁然千里開林梢  
地勢不得藏嵌坳三峯重樓排卦爻二溪卷浪飛怒蛟

漁翁捕魚船尾敲稚子鋸塼爭勝拋小塘圓沙來雁鵝  
茂橘間錯黃金包主人情深漆與膠美酒旋漉羅珍肴  
亦有麟脯膾海鮫痒背只欠麻姑抓浮生胡為長繫匏  
不蹈堅城徒謊謊竊甘祿食憂謗嘲有若夜鼠防飢猫  
羨君脫屣心無殺笑傲自足追由巢猛飲未徹雞鳴嘐  
新詩下筆論卷抄余君酒量辭斗筲醉帽墮地垂鬢髩  
萬子能禪誇悟泡我獨愛酒流涎交同趨至樂情何聲  
德化默亭觀雪呈鄭令

雪風結海天雲永夜寒斷盡朱絲繩曉來何處看猛雪  
鄭令新亭最高絕倒披貂鼠一登臨飛鳥不飛早光滅  
時吟杜甫苦寒詩白鵠翅垂眼流血崑崙闕折非吾憂  
但願春泥補地裂西南香鑪萬尋玉遠思飄然看不足  
欲騎鸞鶴飛其巔身雖未往神明肅又疑夢向瓊池過  
王母樓殿高嵯峨粉圖屏風畫未竟隱隱朽筆方森羅  
天工好奇人莫識縱心壯觀聊唧唧酒瓶倒漉萬籟沈  
客子狂歌主人默默胡為乎名斯亭主人意深窺杳冥

不為四時役不擇萬象嘉與時窮通自消息見我狂歌  
應哭耶

采石亭觀浪

洞庭秋高北風起怒浪排空日光昧坐見雪山飛從物  
外來地軸天闕恐將圯移沙裂石失浦溆羣龍呀呀鯨  
掉尾舟人但如鵲鳴埵咫尺存亡隔千里嗟哉至柔物  
湏洞安可當大禹沒已久巨浸誰為防須臾風收浪亦  
靜嫦娥洗月添寒光湘妃妙曲鼓未徹汨羅之魄雲倘

洋而今君臣正相樂法弊一一新更張監司精明郡縣  
肅國無忠憤惟循良洞庭怪變自出沒迴首天邊歸雁  
行

祀南嶽喜雨呈李倅

元吉

六月赤日方炎炎雲不行天龍遁潛陰陽失職帝怒赫  
地下萬物遭炮燭農夫爭陂數鬪死驅沙擲土唯飛廉  
湖南本錢二十有四萬歲望何以安黎黔府官惶惶使  
臺恐祀壇禱嶽惟精嚴君馳副車職其事秘文在板香

盈匱鑲刀割牲荐肴酒夜半奠玉抽靈籤星河收光脩

陰晦雷聲羣羣來山南

協韻

斯須密點欲裂瓦燭光出屋

排龍髯

謂屋溜也

鼃鼃哀啼曉色淡碧澗久涸銀濤添田田

水足稻秀拔旱暵一洗涼颼兼芬馨羅列報神貺文實

之論前賢僉興雲作雨乃誰柄坐視焦灼慳濡需待茲

誠禱始感發威福自任寧無嫌至理從來莫能詰異景

聊足開吾瞻孤峯翠滑犀露角溢溜飛洒瓊為簾煙藏

拱木半吞吐湘水倒影分毫纖廟門欲出尚回首正似

老筆圖霜縑高吟成章又奇絕睥睨韓杜君何謙嗟余  
適為簿書縛不爾從往精神恢蚊蠅休飛夏將盡清露  
收拾堆圓蟾何當結軌更一往歷覽舜迹窮高尖羣仙  
雖有路歧遠志士豈無巖谷淹收奇拔俊召和氣一國  
遂除災肯占暫時響應未足數此語非是君仍砭

寄題鄂州李屯田家園仁安亭

頭陀樓閣坐青煙畫屏正落南簷前主人隱几寫風物  
幅巾瑩爽南昌仙仙翁讀書五千卷道與世背多迤邐



安之不擾靜以養逸我壽老全于天簾櫳踈踈白光透  
欄檻寂寂花陰圓黃鸝弄巧子趨母白酒釀熟金為船  
淵明醉矣客可去細藤織榻閒欹眠君不見黃鶴樓鸚  
鵡洲碧雲欲合天自晚芳草無情春亦愁襴衡白骨瘞  
何處曹王舊曲無人收沈吟往事變華髮不飲何以銷  
吾憂銷憂乎君且飲醉來天地真衾枕

金陵賞心亭

秦淮青城幾百尺城上高亭望無極南還北去千萬艘

人生何苦戀驚濤百年易得變塵土後世視今今視古  
此間風月最為多莫辭把酒呈高歌前朝宮苑荒煙在  
樂極悲來亦奈何

鍾山寶公塔

盤盤鍾山古城北夾道青松兩行直浮屠突兀倚雲煙  
繪事猶存舊刀尺刀裁尺量不可過浮生不悟欲如何  
凭欄直下眎千里多少丘墟藏綺羅

徐州黃樓歌寄蘇子瞻

君不見彭門之黃樓樓角突兀凌山丘雲生霧暗失柱  
礎日升月落當簾鉤黃河西來駭奔流項刻十大平城  
頭渾濤舂撞怒鯨躍危堞僅若盂盂浮斯民囂囂坐恐  
化魚鼈刺史當分天子憂植材築土夜連晝神物借力  
非人謀河還故道萬家喜匪公何以全吾州公來相基  
疊巨石屋成因以黃名樓黃樓不獨排河流壯觀彈壓  
東諸侯重簷斜飛掣驚電密瓦瑩靜蟠蒼虬乘閒往往  
宴賓客酒酣詩興橫霜秋沈思漢唐跡逆節怙險

終何求誰含頸血濺砧斧千載付與山河愁聖祖神宗  
仗仁義中原一洗兵甲休朝廷尊宗郡縣肅彭門子弟  
長歡游長歡游隨五馬但看紅袖舞華筵不願黃河到  
樓下

留題呂學士無為軍謫居廊軒

城頭高軒眺千里數點蒼山并寒水帆開半落有無間  
鳥飛不斷丹青裏北斗踈踈河漢曉蓬萊一登天下小  
心隨境化形亦忘誰道霜翎老華表曹公窺吳教水戰

虎豹蹠踏鯨鼉轉野父相傳此渡頭魚網時時得遺箭  
當場英氣安在哉千年絕景藏蒿萊地祇監護待賢者  
欄干倚遍傾金罍目送白雲望堯闕忠功孝名堅一節  
明時不作離騷經玉上青蠅解磨滅升沈偶然安足嗟  
與君高詠思無邪數聲長笛奏何處微風吹落天之涯  
天涯桂樹清輝發萬頃波瀾凍冰雪若承紫詔返瀛洲  
此地曾忘遷謫憂

漳南王園樂全亭席上呈同游諸君坐客劉公

曰有水一池有竹千竿可以賦詩浪士勇起索  
筆即其言綴成長調文不加點

樂全有水一池有竹千竿池通兩湖信竹密四時寒引  
子黃鸝弄語探魚碧鳥忘還復有佳賓命酌水晶交錯  
觥船空中聞玉簫王母想乘鸞問君不醉當何適百歲  
憂愁今夕歡嫦娥癡妬理冰盤絳龍蠟淚癡不乾孰知  
大海騰波瀾自有人世藏仙源劉公八十精神全留子  
造古風義全蔡阮名家文學全王氏世醫陰隲全兀兀

浪士天機全樂全乎且飲酒獨醒懷沙亦何有

題畢文簡公撰李白碑陰

清風無根長不死太白高名亦如此何人謂是王佐才  
文簡雄詞瀉秋水賢孫出守鐫長碑碑成字字生光輝  
洗兒妃子已萌亂翩然鳳鳥來非時出林秀木衆欲殺  
納官贖命何其危畫船載酒酌明月不著魚蓑披錦衣  
醉眠天地即衾枕至今荒塚人疑之丈夫闔棺事未定  
後三百歲方逢知知太白文簡公不誇能詩與飲酒惜

其浩氣寔兀藏心胷青山老碧洗秋色姑溪濯綠涵春  
容太白不見碑可見螭盤鼉載傳無窮

寄題湖州東林沈氏東老庵

東林沈郎真隱居山環水遶開方壺何年濯足脫塵網  
坐卧七言哦藥珠有時隱几佚吾老萬事不到靈臺虛  
窺間綠螳春欲活仙翁夜降青雲車自稱山人號回客  
為君猛飲留斯須蚊蠅驅盡燭還滅清風掃地銀蟾鋪  
梨花蕉葉鍾與鼎倒卷錦浪吞鯨魚雙瞳湛湛翦秋碧



三山不動喬松孤歛然踊起拂素壁筆灑二韻鏗瓊琚  
西鄰已富憂不足東老雖貧樂有餘白酒釀來緣好客  
黃金散盡為收書甕乾吟罷尚攜手寥寥天籟鳴笙竽  
渡橋摻袂忽無迹東方漸白飛羣鳥世人尋仙不可得  
仙人寓世情何如桃源歸路杳難問落花流水空踟躕  
後來福禍固已驗死生往復猶坦途園庵不壞子傳業  
玉琴遺韻寒泉俱用回易呂未可必回生回生是亦劉  
方徒

舟經池州先寄夏寺丞

公酉

去年收帆貴池口聞君高歌撞玉斗今朝至自大湖南  
五溪新事為君談一年往返七千里鄉國生還真可喜  
君家白醪應已熟正好齊山泛黃菊

留題方伋秀才壽樂亭

君家有亭何壯哉參差碧瓦鴛鴦排重窓靜深門不闕  
地布瑩甍光如指班班簾竹輕風篴日影射午疑瓊階  
疊山墮勢危相挨牧人圍碁或負柴虎卧洞壑猿攀崖

好鳥上下鳴聲皆真假造物微毫差玉葩照水絕纖埃  
絲篁調音衆伎排水沈焚煙凝晝霾夜晦爛蠟非燃薰  
唱酬交錯并詠諧逢逢曉鼓傳官街兩入塲屋隨計偕  
未得藍綬持簡槐吾寧汲汲同井蛙棄去不顧如敝鞋  
沈潛自適江與淮滔滔動靜終無涯圓天方地安形骸  
雖然此樂非吾懷巖慈鬢髮霜華皆嗟今仕祿猶睽乖  
行間投印歌歸來亭上致宴羅吳娃吳娃醉唱敲玉釵  
綵衣自舞心寧悵心寧悵奉親酒壽樂之榮世希有

青山集卷九

謹案卷七第四頁前一行何似歸來早原本來訛  
未今改

第十頁前一行碧水碧如靛原本靛訛淀今改

卷八第二頁後四行請謁湓江初識面原本謁訛  
說今改


第十一頁前六行吞吳成魏運歸晉原本運訛遇  
今改

卷九第三頁前七行幸對南山值佳節原本山訛

中今改

第八頁前四行植材築土夜連晝原本連訛運今  
改

第十一頁後八行收入圍棋或負柴原本收訛木  
今改



總校官進士臣胡榮  
校對官編修臣裴謙  
謄錄監生臣金士虔